

BAB KEEMPAT

B A B K E E M P A T

KEGIATAN JIM DALAM PENDIDIKAN ISLAM PERINGKAT TINGGI

4.0 Mukadimah

Kemunculan bab ini adalah untuk menghuraikan beberapa aspek yang menyentuh secara langsung kegiatan JIM dalam Pendidikan Islam di peringkat Sijil dan Diploma di Akademi Islah Malaysia [AIM]. Bidang-bidang utama yang akan menjadi topik perbincangan adalah berkisar pada sejarah dan matlamat penubuhan AIM, Lembaga Penasihat Akademik [LPA], senarai nama para pensyarah, program-program yang ditawarkan, pengambilan pelajar dan syarat-syarat kemasukan, perlaksanaan program di kompleks JIM, senarai pusat akademik dan operasi programnya di negeri-negeri, penerimaan masyarakat dan diakhiri dengan rumusan daripada penulis.

4.1 Sejarah Dan Matlamat Penubuhan

Idea kewujudan dan penubuhan AIM adalah dicetuskan oleh mantan presiden JIM Haji Saari bin Sungib di dalam perbincangan perancangan aktiviti JIM bagi tahun 1993-1995. Beliau berpendapat sudah tiba masanya JIM membuat suatu perubahan dengan menjadikan institusi tersebut sebagai pusat tarbiyyah ahli.¹

Pada prinsip dan asal matlamatnya, AIM akan berperanan menjadi salah sebuah wadah rasmi bagi mendidik dan menyalurkan maklumat kepada para ahli JIM ke arah memenuhi tuntutan pembangunan diri dari aspek program peningkatan dan pembudayaan ilmu-ilmu Islam. Dalam waktu sama, mempunyai tahap profesionalisme yang tinggi, memiliki kemahiran-kemahiran yang diperlukan bagi tujuan perjuangan dakwah dan pembentukan ketrampilan diri secara tersusun.²

Ini bermakna, AIM adalah berfungsi sebagai pusat pendidikan dan pentarbiyyahan ahli-ahli JIM dalam bentuknya yang khusus bagi melahirkan para pendakwah yang mampu memikul tanggungjawab melakukan pengislahan di dalam masyarakat.

Program-program yang ditawarkan adalah dikendalikan secara formal sepertimana yang berlaku di institusi pengajian tinggi. Bayaran tertentu yang lebih murah dari bayaran di pasaran biasa telah dikenakan. Ia dikendalikan oleh tenaga akademik profesional yang berkelayakan. Mempunyai sistem peperiksaan dan tahap ujian yang tertentu dan dianugerahi sijil atau diploma bagi yang berjaya. Kemudian timbul satu cadangan daripada rakan-rakan ahli JIM agar AIM dibuka kepada rakan-rakan dan orang ramai.³

Melalui AIM pendekatan tarbiyah kepada ahli-ahli JIM dan bukan ahli telah dilaksanakan secara formal dan tersusun. Di antara program-program sampingan yang telah dijalankan di bawah bumbung AIM adalah seperti program Keluarga Bahagia, Strategi Pengurusan Diri, Strategi Pengurusan Belajar Dan Teknik Mengulangkaji

Berkesan, Kursus Motivasi Ke Arah Kecemerlangan Diri, Ceramah Motivasi, Kursus Mengajar Matematik Di Rumah, Program Pembangunan Kakitangan Majlis Ugama Islam Singapura, Seminar Pengurusan Islam bagi warga Singapura, Kem Kreatif Ke Arah Kecerdasan Pemikiran Anak-Anak, Program Persediaan Pra-Universiti, Kursus Motivasi & Khemah Ibadah.⁴

Daerah operasi AIM bukan sahaja bermotifkan pendidikan dan pengislahan khususnya kepada ahli-ahli JIM, sebaliknya bagi memperluaskan skop penglibatan masyarakat untuk turut serta dalam usaha tersebut.⁵ AIM telah berperanan sebagai pusat melakukan perubahan dan pengislahan kepada para ahli dengan pengisian program-program keilmuan Islam dalam bentuk yang lebih tersusun dan menepati kehendak semasa. Di samping itu, ia berperanan untuk memberikan kursus, seminar dan bengkel berkala yang dilaksanakan bagi membina kemahiran dan ketramplinan tertentu kepada umum.⁶


Dalam pada itu, AIM berfungsi sebagai pusat dakwah dan pendidikan dalam bentuk sebuah institusi yang menawarkan program-program diploma dan sijil serta kursus-kursus tertentu. Ia bertujuan bagi mempersiapkan masyarakat dengan ilmu, kemahiran dan ketramplinan tertentu bagi melaksanakan tanggungjawab pengislahan.⁷

4.2 Lembaga Penasihat Akademik [LPA] Dan Senarai Para Pensyarah

Bagi menjadikan AIM sebuah pusat pendidikan secara formal dan bersistem, maka suatu Lembaga Penasihat Akademik [LPA] telah ditubuhkan serentak dengan

kewujudan AIM. Perlantikan LPA ini akan menjadikan AIM setaraf dengan lain-lain institusi pendidikan tinggi yang menawarkan program yang serupa dan memudahkan kerja-kerja pentadbiran.⁸

Seterusnya AIM telah dijadikan salah satu unit yang berada di bawah Pejabat Presiden JIM yang terletak di Kompleks JIM Pusat Pusat Bandar Melawati, Kuala Lumpur. Struktur LPA adalah seperti berikut :-⁹



Pengerusi dan Ahli LPA akan berperanan menentukan program-program yang akan ditawarkan dan dilaksanakan di Komplek JIM. Mereka juga akan melebarkan pelaksanaan program-program tersebut kepada negeri-negeri dan daerah-daerah yang berminat. Projek usahasama yang berorientasikan konsep francais akan digunakan kepada negeri dan daerah yang berminat.¹⁰

Tenaga pensyarah akan ditentukan oleh AIM yang didatangkan dari universiti-universiti tempatan dan tokoh-tokoh ilmuan yang terlibat di dalam sektor awam dan swasta. Kebanyakan mereka adalah ahli-ahli dan rakan-rakan JIM.¹¹

Di antara tenaga-tenaga pensyarah yang pernah berkhidmat di AIM ialah Ustaz Alias Othman [bekas pensyarah UM], Dr. Farid Sheikh Ahmad [UIAM], Dr. Abdullah Yassin [Unit Dakwah Badan Penasihat Arab Saudi], Dr. Anisah Abdul Ghani [UM], Dr. Dzulkifly Ahmad [Pengarah Akademi Pengembangan Iktisas], En. Mohd Adam Said [Ketua Eksekutif Irshad Consulting], Dr. Salmi Mohd Sohod [Pengarah Urusan Best Practise Management International Sdn. Bhd], Dr. Barjoyai Bardai [Presiden Management & Consultancy Sdn. Bhd.], Us. Zakaria Ahmad [Sek. Men. Al-Irshad], En Ahmad Hj. Yaacob [Juruperunding Kanan Irshad Consulting], Ustaz Ahmad Hairuddin Murtani [UIAM], Ustaz Zaifuddin Mohd Rasip [UIAM], Ustaz Mohd Khalid Hj. Mohd Isa, Ustaz Annuar Salleh, Ustaz Jamaluddin Abdul Wahab, Ustaz Abd. Muien Abd. Rahman dan beberapa orang pensyarah yang ditentukan oleh pihak negeri dan daerah.¹²

4.3 Program-Program Yang Ditawarkan

Di peringkat diploma, AIM telah menawarkan program-program yang berhubung rapat dengan disiplin ilmu-ilmu Islam kepada ahli-ahli JIM dan terbuka kepada rakan-rakan JIM serta orang ramai. Di antara program-program tersebut adalah seperti berikut :¹³

- a. Diploma Pengajian Al-Qur'an dan Al-Hadith.
- b. Diploma Pengajian Islam.
- c. Diploma Pemikiran dan Kefahaman Islam.
- d. Diploma Pengurusan Islam.
- e. Diploma Pengurusan Perbandingan.
- f. Diploma Perniagaan dan Keusahawanan Islam.
- g. Diploma Pengurusan Dakwah Dalam Masyarakat Majmuk Di Malaysia.
- h. Diploma Pengajian Islam dan Tamadun.

Seterusnya terdapat juga kelas pengajian tertentu seperti Kelas Pengajian Bahasa Arab dan Kelas Tilawah Al-Qur'an yang menawarkan sijil kepada yang berjaya. Setakat ini program tersebut belum dapat dilaksanakan.¹⁴

Satu program yang baru diperkenalkan dan masih dalam proses penyediaan modul adalah Program Sijil Psikologi Kaunseling Islam. Pada dasarnya program ini akan ditawarkan kepada para sukarelawan yang bertugas di UKI dan seterusnya dibuka kepada orang ramai.¹⁵

4.4 Pengambilan Pelajar

Pada prinsipnya calon-calon yang mengikuti program-program AIM adalah terdiri daripada para ahli JIM di seluruh negara. Namun begitu, atas permintaan daripada rakan-rakan JIM dan masyarakat, maka penyertaannya dibuka kepada masyarakat umum.¹⁶

Bagi memenuhi keperluan kelayakan, maka calon-calon hendaklah memiliki syarat minimum dengan lulus SPM. Mereka boleh memohon melalui borang tertentu yang mengandungi borang dan prospektus RM5.00, yuran pendaftaran RM20.00, yuran pengajian RM1,200.00 setahun atau bayaran ansuran RM100.00 sebulan dan yuran peperiksaan RM300.00 satu semester. Lokasi pengajian boleh dipilih oleh para calon dari negeri-negeri yang menawarkan program-program yang berkaitan.¹⁷

4.5 Perlaksanaan Program Di Kompleks JIM

Kompleks JIM adalah pusat pengajian sesi akademik AIM atau dengan lain perkataan ia adalah kampus induk bagi seluruh negeri yang melaksanakan program-program yang ditawarkan. Sesi pengajian akan dilaksanakan selama setahun yang mengandungi dua semester yang bermula pada bulan Januari. Setiap semester mengandungi 72 jam kuliah serta tidak termasuk waktu peperiksaan. Setiap bulan para peserta akan menghadiri dua sesi kuliah. Sesi kuliah pertama akan diadakan pada setiap hari Sabtu selama empat jam. Kuliah akan bermula dari jam 2.30 hingga 6.30

petang. Sesi kuliah kedua pula adalah pada hari Ahad yang akan berlangsung selama lapan jam. Kuliah akan bermula pada jam 8.00 pagi hingga 5.00 petang.¹⁸

Para peserta akan mengikuti 12 jam kuliah bagi setiap modul di dalam setiap semester. Struktur program yang dilaksanakan adalah mengandungi sesi kuliah, bengkel dan pembentangan, kerja kumpulan, tugas/praktikal dan peperiksaan akhir semester. Di akhir semester, para peserta akan menghadapi peperiksaan yang memakan masa satu setengah jam bagi setiap kertas peperiksaan. Kesemua soalan adalah dalam bentuk eseи. Komponen utama bagi melaksanakan penilaian untuk peperiksaan akhir semester adalah kehadiran [20%], kerja kursus [40%] dan peperiksaan akhir semester [40%].¹⁹

Urusan pembayaran boleh dilakukan sekaligus atau secara ansuran pada setiap bulan. Para peserta juga akan dibekalkan bahan teks kursus tanpa sebarang bayaran tambahan yang telah disediakan oleh para pensyarah yang berkaitan.²⁰

Penganugerahan diploma akan dilaksanakan oleh AIM setelah para peserta memenuhi syarat-syarat berikut:-²¹

- a. Menghadiri kuliah tidak kurang dari 70%.
- b. Peserta hendaklah mencapai sekurang-kurangnya gred D bagi modul-modul yang diikuti dalam setiap semester.
- c. Calon telah menjelaskan yuran pengajian.
- d. Seseorang calon yang gagal menghadiri mana-mana peperiksaan tanpa alasan yang kukuh adalah dianggap gagal dalam peperiksaan.

- e. Apabila seseorang calon gagal dalam kertas tertentu dalam peperiksaan akhir semester, maka ia dibenarkan mengulanginya pada hari yang telah ditetapkan.
- f. Seandainya terdapat calon yang gagal melebihi 50% dari bilangan peperiksaan sebelum semester akhir, maka calon akan dianugerahkan sijil tanpa diploma dengan syarat lulus kertas peperiksaan yang lain.

Sehingga penulisan ini dapat disempurnakan, dua program bertaraf diploma telah dilaksanakan kepada ahli-ahli FIRDAUS [Gerakan Dakwah Semasa] iaitu salah sebuah badan dakwah Islam di Singapura. Seramai tujuh puluh lima orang telah terlibat di dalam Program Pengajian Islam & As-Sunnah. Seterusnya seramai lapan belas orang calon telah mengikuti sesi pengajian Diploma Pengurusan Islam.²²

Pada detik 22 Februari 1998 adalah saat bersejarah kepada AIM kerana graduan sulung telah menerima penganugerahan diploma di Majlis Konvokesyen Kali Pertama AIM di Komplek JIM.²³

4.6 Senarai Pusat dan Perlaksanaan Program Di Negeri-Negeri

Konsep perlaksanaan sesi akademik di peringkat negeri atau pun zon adalah seperti konsep francais dalam bentuk persetujuan yang dibuat oleh AIM dan diperingkat negeri atau zon.²⁴ Pelaksanaannya adalah terpulang kepada setiap lokasi pengajian di peringkat negeri atau zon. Pihak urusetia akan mengambil kira tenaga pensyarah setempat atau yang berdekatan bagi mengendalikan modul-modul yang berkaitan. Seandainya timbul masalah dalam menyediakan tenaga pensyarah, maka

pihak urusetia negeri atau zon akan mengimport tenaga pensyarah yang sedia ada di AIM.²⁵

Pada dasarnya tidak semua negeri mampu untuk mengendalikan program diploma atas faktor kekurangan sumber tenaga dan kemudahan infrastruktur pengajian yang sesuai. Oleh itu, pendekatan pusat pengajian secara zon yang sama dilaksanakan bagi negeri-negeri yang berhampiran. Contohnya negeri-negeri yang berada di sebelah selatan akan menjadikan Johor sebagai pusat pengajian.²⁶

Setakat ini, Program Diploma Pengajian Islam dan Program Diploma Al-Qur'an dan Al-Sunnah telah berjaya diadakan di Kuala Lumpur iaitu berpusat di Komplek JIM yang telah dimulakan pada bulan Disember 1996, Kuantan bermula pada Februari 1997, Negeri Johor pada bulan Jun 1997, Pulau Pinang bermula pada Oktober 1997, Perak pada November 1997, Singapura dan Pahang telah memulakan program mereka pada bulan Januari 1997.²⁷

Seterusnya satu lagi program yang baru diperkenalkan adalah program Diploma Pengislahan Masyarakat dan Pengurusan Alaf Baru. Program ini dilaksanakan sebagai salah satu pendekatan tarbiyyah di seluruh negeri dan zon-zon tertentu. Sesi pertama pengambilan telah dilaksanakan pada 28 Februari 1998. Program ini dilaksanakan selama sepuluh bulan. Kadar yuran pengajian yang ditetapkan adalah RM500.00 yang boleh dijelaskan sewaktu pendaftaran atau ansuran bulanan. Bayaran tersebut merangkumi bahan teks kursus, sewaan dewan kuliah,

peralatan syarahan, sijil, kos perjalanan dan honorarium tenaga pensyarah. Program Diploma ini dilaksanakan khusus kepada :-²⁸

- a. AJK JIM Pusat dan Wanita JIM Pusat.
- b. AJK JIM Negeri.
- c. AJK Wanita JIM Negeri.
- d. AJK JIM Daerah.
- e. AJK Wanita JIM Daerah.
- f. Ahli-ahli yang telah didaftarkan sebagai ahli-ahli teras.

Kehadiran bagi setiap aktiviti bagi program tersebut adalah wajib kecuali atas sebab-sebab yang dibenarkan oleh YDP JIM Negeri dengan kelulusan JK Pusat. Dalam keadaan ini seseorang itu dibenarkan menghantarkan wakil untuk mencatatkan nota. Kehadiran wakil tersebut tidak dikira untuk tujuan penilaian bagi melayakkan penganugerahan diploma.²⁹

Peperiksaan akhir telah dilaksanakan secara serentak di seluruh negara pada 1 Mac 1998 dalam jangkamasa empat jam yang merangkumi tiga modul. Calon-calon yang tidak menghadiri peperiksaan itu adalah dianggap gagal dalam peperiksaan tersebut. Tiada peperiksaan ulangan bagi yang gagal menghadiri peperiksaan yang telah ditetapkan. Sijil hanya diberikan kepada calon-calon yang gagal dengan syarat mereka lulus dua lagi komponen penilaian, iaitu kehadiran dan kerja kursus.³⁰

Kesemua peserta yang mengikuti program tersebut telah lulus dan layak menerima Diploma Pengislahan Masyarakat dan Pengurusan Alaf Baru. Seandainya calon belum menjelaskan yuran penuh pengajian, maka ia tidak layak untuk menerima

Diploma atau Sijil sehingga yuran tersebut dijelaskan. Gred peperiksaan yang dilaksanakan adalah seperti berikut :-³¹

a.	Cemerlang	-	75 - 100
b.	Baik	-	65 - 74
c.	Sederhana	-	55 – 64
d.	Lulus	-	50 – 54
e.	Gagal	-	Tidak memenuhi syarat kelulusan kehadiran 10%, kerja kursus 20% dan peperiksaan akhir 20%.

4.7 Penerimaan Masyarakat

Secara keseluruhannya, ahli JIM khususnya dan masyarakat umumnya yang terdiri daripada rakan-rakan JIM dan rakan-rakan di Singapura telah menyambut baik perlaksanaan program AIM.³²

Pendekatan tarbiyyah secara formal dan profesional ini telah membawa satu perubahan baru dalam paradigma pentarbiyahan ahli di dalam sebuah gerakan Islam. Penyertaan rakan-rakan JIM di Singapura melalui PERDAUS telah membuktikan program sedemikian rupa boleh diketengahkan sebagai salah satu kaedah ke arah pendidikan diri, peningkatan ilmu dan ketrampilan personaliti.³³

Bagi ahli-ahli JIM khususnya yang mengikuti kuliah dan terlibat untuk menjayakan program tersebut, merupakan satu kejayaan bagi mereka dan JIM. Di

samping memperolehi ilmu, ini adalah salah satu cara yang dapat menepati tuntutan tarbiyyah yang biasanya wujud di dalam usrah, tamrin, liqa' al-fikri dan seumpamanya telah disesuaikan dengan kehendak semasa.³⁴

4.8 Rumusan

Berpandukan huraiān di dalam bab ini, bolehlah dibuat satu kesimpulan bahawa pihak JIM sedang berusaha untuk merelisasikan suatu strategi pembinaan ahli secara formal dan profesional melalui pendekatan yang telah dilaksanakan di IPT.

Pendekatan ini telah cuba mengubah paradigma lama pendidikan ahli yang hanya tertumpu di dalam kumpulan-kumpulan kecil atau kursus-kursus jangka pendek. Melalui AIM kaedah penyampaian ilmu tersebut telah diinstitusikan dalam sistem pengajian yang mirip kepada universiti serta bertaraf diploma dan sijil.

Sehingga hari ini AIM sedang berusaha untuk memperolehi pengiktirafan dari UIAM, UM dan UKM bagi pemegang-pemegang diploma agar setanding dengan lepasan universiti tempatan. Di samping mereka menerima pengisian ilmu yang berkaitan dengan Islam, mereka juga memperolehi bukti penyertaan melalui anugerah diploma yang diterima.³⁵

Menjelang tahun 1999 AIM telah menangguhkan sementara waktu seluruh program yang ditawarkan daripada beroperasi. Ini disebabkan kesibukan JIM dalam

menangani isu-isu semasa serta terlibat secara langsung dalam ledakan kebangkitan rakyat menuntut keadilan dan menentang kezaliman.³⁶

NOTA HUJUNG

- ¹ Temuramah bersama Us. Syamsul Maarif Ismail, bekas urusetia AIM, pada 18Julai 2000 jam 11.00 pagi di Kompleks JIM Pusat di Bandar Melawati, Kuala Lumpur.
- ² Ibid, temuramah bersama Us. Syamsul Maarif Ismail.
- ³ Ibid, temuramah bersama Us. Syamsul Maarif Ismail.
- ⁴ Laporan Tahunan JIM 1995, hlm. 27-29; Laporan Tahunan JIM 1996, hlm. 21-22.
- ⁵ Prospektus Program Diploma Pengajian Islam, Cetakan Pertama, Mei 1997, hlm. 1.
- ⁶ Op.Cit. temuramah bersama Us. Syamsul Maarif Ismail.
- ⁷ Ibid, temuramah bersama Us. Syamsul Maarif Ismail.
- ⁸ Ibid, temuramah bersama Us. Syamsul Maarif Ismail.
- ⁹ Ibid, temuramah bersama Us. Syamsul Maarif Ismail.
- ¹⁰ Op.Cit. Prospektus Program Diploma Pengajian Islam dan Tamadun, hlm. 1.
- ¹¹ Op.Cit. temuramah bersama Us. Syamsul Maarif Ismail.
- ¹² Prospektus Program Diploma Pengajian Islam, Cetakan Pertama, Mei 1997, hlm. 3.
- ¹³ Prospektus Program Diploma AIM, Cetakan Pertama, Mei 1997.
- ¹⁴ Brosur Kelas Pengajian Bahasa Arab dan Kelas Membaca Al-Qur'an.
- ¹⁵ Prospektus Sijil Psikologi Kaunseling Islam, cetakan pertama, 3 Ogos 1998.
- ¹⁶ Op.Cit. temuramah bersama Us. Syamsul Maarif Ismail.
- ¹⁷ Brosur Program Diploma Pengajian Islam dan Diploma Al-Qur'an dan Al-Sunnah.
- ¹⁸ Prospektus Program Diploma Pengislahan Masyarakat dan Pengurusan Alaf Baru, hlm. 5.

- ¹⁹ Ibid, Prospektus Program Diploma Pengislahan Masyarakat dan Pengurusan Alaf Baru, hlm. 5.
- ²⁰ Ibid, Prospektus Program Diploma Pengislahan Masyarakat dan Pengurusan Alaf Baru, hlm. 7.
- ²¹ Ibid, Prospektus Program Diploma Pengislahan Masyarakat dan Pengurusan Alaf Baru, hlm. 4.
- ²² Laporan Tahunan JIM 1996, hlm. 22.
- ²³ Laporan Tahunan JIM 1998, hlm. 6.
- ²⁴ Op.Cit. Laporan Tahunan JIM 1996, hlm. 22.
- ²⁵ Op.Cit. temuramah bersama Us. Syamsul Maarif Ismail.
- ²⁶ Ibid, temuramah bersama Us. Syamsul Maarif Ismail.
- ²⁷ Laporan Tahunan JIM 1997, hlm. 15.
- ²⁸ Ibid, Laporan Tahunan JIM 1997. hlm. 6; Op.Cit. Prospektus Program Diploma Pengislahan Masyarakat dan Pengurusan Alaf Baru, hlm. 6.
- ²⁹ Ibid, Laporan Tahunan JIM 1997. hlm. 6.
- ³⁰ Ibid, Laporan Tahunan JIM 1997. hlm. 7-8.
- ³¹ Ibid, Laporan Tahunan JIM 1997. hlm. 8.
- ³² Op.Cit. temuramah bersama Us. Syamsul Maarif Ismail.
- ³³ Ibid, temuramah bersama Us. Syamsul Maarif Ismail.
- ³⁴ Ibid, temuramah bersama Us. Syamsul Maarif Ismail.
- ³⁵ Temuramah bersama Dr. Sahrim B. Ahmad, Setiausaha Agung JIM Pusat pada 23 Mac 2000 jam 10.30 pagi.
- ³⁶ Ibid, Temuramah bersama Dr. Sahrim B. Ahmad.